

Donostian, Gipuzkoako Diputazioaren jauregian, bildu dira: Arrue, Irigoyen, Lekuona, Mitxelena eta Villasante euskaltzaiñak; Aresti, Artola, Berriotxo anaia, J. M. Lekuona, Aita Onaindia, San Martin, Aita Zabala eta Zubikarai urgazleak. Ezin etorria adierazi du aldez aurretik Lojendio euskaltzaiñak.

Azken batzar-agiria onartu da. Orri buruz eta araudiaren eraberritzea dala eta, Arrue'k azaldu nai izan du Haritschelhar'ek azken batzarrean aotan artu zuen araudi berriko 14-garren artikulua eztagoela iñori bein aitortu zaion euskaltzaingoa kentzeko asmatua, argi eta garbi baitio euskaltzain izendatua izan danak euskaltzain iraungo duela bizi daiño. Beronek jakinerazi du Fernando Amezkettarren omenaldia Agorrillan izango dala, ez Abuztuan, eta Euskaltzaindiaren geriza eskatuko dutela orretarako.

Irigoyen'ek aditzera eman du nola egin dan Bilbaon Abasolo andereño irakaslearen euskal-azterketa.

Loiolan izango dugun batzarrez, Aita Goikoetxea mintzatu da Aita Villasante'rekin eta zadorlariarekin ere egongo da, prestamenak egiteko. Lekuona euskaltzaiñak erderazko bat eredu arturik egin barria duen aur-liburua aurkeztu du, iritzi-emaille bat auta dedin, liburua ikusi ondoren aren berri Loyolan eman dezan. Berriotxo Anaia autatu dute egiteko orretarako.

San Martin'ek gogorazten du beste billera batean, Bilbaon, Julene Azpeitia andreari eskatu zitzaiola gisa orretako libururen bat presta zezan eta, oraindik orain esan dionez, gerturik dadukala ia. Gogoz artuko du Euskaltzaindiak lan ori, aurrentzako irakurgaien bear gorrian gauden ezkeru.

Aurtengo Agora'ren euskal-eleberri-saria, dio zadorlariak, Euskaltzaindiak autatu zuen epai-maiak Sebastian Salaberria'ri eman dio, *Neonek tirako nizkin* deriztan irakurgaiagatik.

Bertsolari-sariketa dala-ta, batzordekoek eman dute Erreterian atzo eta Mungian il onen 19-an egin diran saioen berri. Azkoiti'ko erriagintariak Aita Zabala'gana jo dute datorren illaren 9-a, igandea, autatu dutela esanaz ango saiorako. Baiezkoan erantzun bekie.

Azkena, Donostian, noiz izango dan Nafarroatik galdetu duten ezkeru, Arrue'k dio bere iritiz, lehen bezala, urte-buruan bear lukeala izan.

Aita Zabala'k gero idazten ari dan lana irakurri du, bertsolari sariketetan erabakiak artzeko bear diran oiñarriak ipintzeko. Elkarriketa luzea izan da orren inguruan eta azkenik eskatu zaio Aita Zabala'ri bukatu ondoren batzordekoen eskuetan utzi dezan bere lana oen iritzia jakin dezagan.

Aurtengo Lizardi poesia-saria emateko Aresti, Artola, J. M. Lekuona, A. Onaindia eta Zubikarai bildu dira. Saria Antonio Bilbao Monasterio, Morgakoak, eramane du "Loraen zugatza" olerkiarekin. Zenbait boto izan dituzte gaiñera Yon Ayertza (Tolosa), Victoriano Gandiaga (Arantzazu), Juan Jose Alberdi (Pasaia) eta Martin Ugalde'k (Brinkola).

Lekeitioko Ayuntamentuak izkribu bat egin dio Euskaltzaindiari ango euskal-irakastaldi, "Cátedra Resurrección Maria de Azkue" izenarekin, bere itzala eman dizean. Baiezkoan erantzun bekie.

Orobat erantzun bekio baiezkoan Buenos Airesko Jesus de Zabala Jaunari: ango euskal-elkargoek antolatu duten Azkue'ren omenaldirako zenbait itz bidaliko ditu, euskeraz, zadorlariak eta idazki batzuek ere igorriko zaizkie, Azkue zanak egin zuen lanaren berri ongi jakin dezaten.

Loiolan, dio zadorlariak, irakurriko du lantxo bat euskal-azterketei buruz, Berriotxo Anaiaren laguntzarekin prestatua, gero Euskaltzaindiak araz erabaki dezan.

Zadorlariak oroitarazten du Euskaltzaindiaren bulego-lanen antolamena egiteko daukagula oraindik. Orrezaz mintzatu zaizkio, berriz ere, Bizkaiko "Junta de Cultura"-koak, Bilbaon izan berriak diran Euskal izkintza eta literaturarekiko izketaldietan. Nolanai ere, bear ori agirian dago eta orobat diote batzarkide guztiak. Irigoyen'i eskatu zaio, beraz, gai onezaz mintza dedin datorren batzarrean.

Oi diran otoitzez asi eta bukatu da batzarrea.